

## SAMÞYKKT

### um hundahald í Egilsstaðabæ.

#### 1. gr.

Hundahald í Egilsstaðabæ sætir þeim takmörkunum sem samþykkt þessi kveður á um.

#### 2. gr.

Sveitarstjórn getur veitt lögráða einstaklingum, sem búa í sveitarfélaginu, leyfi til hundahalds. Leyfið er bundið við nafn og heimilisfang einstaklingsins og óheimilt er að framselja það. Leyfið er einnig bundið við þann hund sem sótt er um heimild fyrir hverju sinni.

Leyfi samkvæmt 1. mgr. má veita með eftirfarandi skilyrðum:

- a) Ef sótt er um leyfi til að halda hund í fjölbýlishúsi, skal skriflegt samþykki allra íbúðareigenda í sama stigagangi fylgja umsókn. Sé um að ræða parhús eða raðhús skal fylgja umsókn skriflegt samþykki eigenda aðliggjandi íbúða. Í fjölbýlishúsi með sérstökum inngangi fyrir hverja íbúð skal fylgja skriflegt leyfi allra íbúðareigenda.
- b) Leyfisgjald skal greiða árlega til sveitarsjóðs eftir gjaldskrá sem sveitarstjórn samþykkir og staðfest er af umhverfisráðherra. Heimilt er sveitarstjórn að fella niður eða ákveða lægra gjald fyrir nytjahunda, t.d. hunda sem notaðir eru til löggæslu eða björgunarstarfa og minkahunda. Af leiðsöguhundum sem blindir eða sjónðaprir nota vegna fötlunar sinnar skal ekki greiða gjald. Gjaldið skal greitt fyrirfram í fyrsta sinn við skráningu hunds til næstkomandi júlímánaðar og síðan árlega 1. júlí fyrir eitt ár í senn. Hafi gjaldið ekki verið greitt innan tveggja mánaða frá gjalddaga fellur leyfið sjálfkrafa úr gildi.
- c) Við greiðslu gjalds samkvæmt b-lið ber leyfishafa að framvísa vottorði dýralæknis um að hundurinn hafi verið hreinsaður af bandormum og spóluormum svo og öðrum skilríkjum sem máli skipta. Hundar skulu færðir til hreinsunar í nóvember til desember ár hvert eftir nánar auglýstum tíma. Mæti eigandi ekki með hund sinn til árlegrar hreinsunar á boðuðum tíma, ber hann sjálfur kostnað sem af því kann að leiða.
- d) Leyfishafi skal hafa hund sinn ábyrgðartryggðan hjá viðurkenndu váttryggingafyrirtæki. Váttrygging skal ná til alls þess tjóns sem dýr hans kann að valda á mönnum og munum. Lágmarkstryggingarupphæð verði kr. 10.000.000 (tíu milljónir). Vottorð um ábyrgðartryggingu skal liggja fyrir við greiðslu leyfis og árlegs leyfisgjalds.
- e) Hundurinn skal ávallt bera ól um hálsinn. Á ólinni skal vera plata, sem í er greipt skráningarnúmer hundsins, nafn eiganda og símanúmer.
- f) Óheimilt er með öllu að láta hunda ganga lausa innan marka þéttbýlis nema nytjahunda þegar þeir eru að störfum í gæslu eiganda eða umráðamanns. Hundar skulu annars ávallt vera í taumi utan húss og í fylgd manneskju sem hefur fullt vald yfir þeim. Þegar hundur er í festi á lóð skal lengd festarinnar við það miðuð að óhindrað megi ganga að aðaldyrum hússins. Hundeiganda er alltaf skylt að fjarlægja saur eftir hundinn.
- g) Leyfishafa ber að sjá svo um að hundur hans valdi ekki hættu, óþægindum eða óþrifnaði eða raski ró manna.
- h) Eigi má hleypa hundum inn í almenningsfarartæki, leikvelli, íþróttavelli eða aðra þá staði sem um ræðir í 4. og 8. kafla og 11.-16. kafla heilbrigðisreglugerðar nr. 149/1990, með síðari breytingum, ekki þar sem matvæli eru meðhöndluð, sbr. reglugerð um matvæli, né inn í húsnæði vatnsveitna, sbr. reglugerðir um neysluvatn og ölkelduvatn. Þessir staðir eru m.a. eftirfarandi:

1. Vatnsveitur, vatnsból og verndarsvæði þeirra, brunnar og sjóveitur
  2. Almennings- og útisalerni
  3. Hvers konar sorpgeymslu- og sorpförgunarstaðir
  4. Gististaðir, veitingastaðir og matsölustaðir
  5. Tjald- og hjólhýsasvæði, nema samkvæmt ákvörðun umsjónaraðila
  6. Húsakynni þar sem geymd eru, framleidd eða seld matvæli
  7. Skólar, kennslustaðir, barnaheimili og gæsluvellir
  8. Rakarastofur, hárgreiðslustofur, hvers konar snyrtistofur og sólbaðsstofur
  9. Heilbrigðisstofnanir, hæli, heilsuræktar- og íþróttastöðvar og baðstaðir
  10. Fangelsi og aðrar vistarverur handtekinna manna
  11. Samkomuhús hvers konar og almennar skrifstofur
  12. Kirkjugarðar, bálstofur, líkhús og líkgeymslur
  13. Almenn samgöngutæki
- i) Bannað er að fara með hunda á almennar útisamkomur.
  - j) Ákvæði stafl. h) og i) hér að framan gilda ekki um nytjahunda að störfum.
  - k) Óheimilt er að láta hund dvelja lengur en einn mánuði á heimili án þess að sótt sé um leyfi fyrir honum.
  - l) Ekki er leyfilegt að hafa fleiri en tvo hunda eldri en þriggja mánaða á sama heimilinu.
- Ákvæði vegna lögbýla:
- m) Ekki þarf að sækja sérstaklega um leyfi fyrir hundahaldi á lögbýlum nema séu fleiri en tveir fullorðnir hundar á heimilinu. Skal þá tilgreind ástæða og umsögn dýraeftirlitsmanns fylgja umsókninni.
  - n) Ekki þarf að greiða leyfisgjald af hundum á lögbýlum, þó skulu eigendur hunda þar greiða þann kostnað sem af lögbundnum hreinsunum og lækniaðgerðum hlýst, sbr. c-lið í 2. gr. eftir því sem við á.
  - o) Hundar á lögbýlum mega ganga frjálsir á landareignum eigenda sinna. Að öðru leyti gilda ákvæði 2. gr. eftir því sem við á m.a. varðandi merkingar.

### 3. gr.

Umsóknum um leyfi til hundahalds skal skila til sveitarstjórnar eða fulltrúa hennar á þar til gerðum eyðublöðum. Með undirritun umsóknar skuldbindur umsækjandi sig til að hlíta í einu og öllu fyrir mælum samþykktar um hundahald. Sveitarstjórn veitir eða synjar umbeðnu leyfi að fenginni umsögn dýraeftirlitsmanns. Leyfishafi fær afhenta plötu, sbr. ákvæði e-liðar í 2. gr. Sé leyfis ekki vitjað mánuði eftir að það er veitt fellur það sjálfkrafa úr gildi.

### 4. gr.

Dýraeftirlitsmaður skal vera starfandi í Egilsstaðabæ og setur sveitarstjórn honum starfsreglur í samráði við heilbrigðisnefnd. Skal hann gefa sveitarstjóra eða fulltrúa hans, sem með þessi mál fer, skriflega skýrslu um þau dýr sem hann þarf að hafa afskipti af.

Dýraeftirlitsmaður skal færa upplýsingar um leyfða hunda í þar til gerða bók. Þar skal einnig skrá nafn og heimilisfang leyfishafa. Dýraeftirlitsmaður skal árlega senda heilbrigðis-eftirlitinu skrá yfir leyfða hunda.

Dýraeftirlitsmaður starfar í umboði heilbrigðisnefndar. Hann annast eftirlit með hundahaldi í sveitarfélaginu og nýtur til þess fulltingis lögreglu.

### 5. gr.

Við minniháttar brot á samþykkt þessari skal hundeigandi sæta skriflegri áminningu og greiða allan kostnað er leiðir af brotinu. Ef um ítrekað eða meiriháttar brot er að ræða gegn ákvæðum þessarar samþykktar eða öðrum reglum sem um hundahald gilda getur sveitarstjórn

afturkallað leyfið. Skal leyfishafi þá afhenda hundinn dýraeftirlitsmanni eða lögreglu til ráðstöfunar. Einnig getur sveitarstjórn afturkallað öll leyfi til hundahalds telji hún þess brýna þörf.

Leyfishafa ber ætíð að greiða kostnað sem leiðir af broti á samþykkt þessari.

6. gr.

Hunda sem ganga lausir utan húss í þéttbýli skal handsama og færa í sérstaka geymslu á vegum sveitarfélagsins. Sama gildir um hættulega hunda og óleyfilega. Kostnaður við töku og geymslu hunda skal að fullu greiddur af eigendum. Hunda sem ráðast á menn eða skepnur og bíta skal fjarlægja og er lögreglu og dýraeftirlitsmanni heimilt að lóga þeim þegar í stað. Aðra hunda er heimilt að afhenda ef leyfi er framvísað innan 7 daga frá því að hundurinn er kominn í vörslu dýraeftirlitsmanns enda verði áfallinn kostnaður greiddur áður en það er gert. Að öðrum kosti ber að aflífa hundinn, enda hafi eiganda verið tilkynnt um töku hundsins, ef unnt er.

7. gr.

Sinni leyfishafi samkvæmt samþykkt þessari ekki skriflegri áminningu eða brjóti endurtekið af sér er heimilt að beita hann dagsektum og svipta hann leyfi, sbr. ákvæði laga nr. 7/1998 um hollustuhætti og mengunarvarnir. Skal leyfishafi greiða allan kostnað er til fellur vegna brota hans á samþykktinni.

Með brot á samþykkt þessari skal fara samkvæmt ákvæðum laga nr. 7/1998 um hollustuhætti og mengunarvarnir.

8. gr.

Samþykkt þessi er samin og samþykkt af bæjarstjórn Egilsstaðabæjar og staðfestist hér með samkvæmt ákvæðum 25. gr. laga nr. 7/1998 um hollustuhætti og mengunarvarnir til þess að öðlast gildi þegar í stað. Frá sama tíma fellur úr gildi samþykkt um hundahald nr. 523/1994.

*Umhverfisráðuneytinu, 20. apríl 1998.*

F. h. r.

**Ingimar Sigurðsson.**

*Sigurbjörg Sæmundsdóttir.*

## AUGLÝSING

### um breytt deiliskipulag miðhluta Húsavíkurhafnar.

Á fundi bæjarstjórnar Húsavíkur þann 28. apríl 1998 var samþykkt breyting á deiliskipulagi miðhluta Húsavíkurhafnar. Breytingin felur í sér stækkun byggingarreita á þremur lóðum og einnig er breytt húsafjöldi sem heimilt er að byggja á hverri lóð.

Breytingin fór í grenndarkynningu skv. 26. gr. skipulags- og byggingarlaga nr. 73/1997. Deiliskipulagið tekur þegar gildi.

*Byggingarfulltrúinn á Húsavík, 28. apríl 1998.*

**Gaukur Hjartarson.**